

菩薩本生變論卷第三

第四
同卷

右二

聖 勇 善 薩 等 造

慈心龍王消伏怨害緣起第七

宋朝散大夫試鴻臚少卿同譯經梵才大師紹德慧詢等奉詔譯

菩薩往昔以瞋因緣墮於龍中有三種毒所

右二

謂氣毒眼毒觸毒又由別報福業力故身具

衆色如七寶聚不假日月光明所照常與無

量百千諸龍周匝圍繞以爲眷屬變現人身

容色端正住毗陀山幽邃之處多諸林木華

果茂盛清淨池沼甚可愛樂與諸龍女作衆

歌舞共相娛樂止住其中經于無量百千萬

歲是時有一金翅鳥王飛騰翔集從空而下

欲取諸龍以爲所食當其來時搏風鼓翼摧

山碎石江河川源悉皆乾竭時彼諸龍及龍

女等見是事已心大驚怖所著瓔珞嚴身之

具顛掉不安恐墜于地咸作是言今此大怨
喙如金剛所觸皆碎將來歟我其當奈何是
時龍王初聞此說極生憂惱由宿善力復更
思惟心乃無畏然此金翅具大威力唯我一
身可能禦彼謂諸龍曰汝等但當從吾之後
必無所害若我不能與其朋屬作守護者何
用如是大身之爲爾時龍王詣金翅所心無
怯弱而白彼言幸少留神共議此事汝於我
身常生怨害我於仁者都無此念以宿惡業
招此大身雖具三種氣眼觸毒未嘗於他暫
興損害度已之能可相抗敵亦能遠去令汝
不見我今所以不委去者多有諸龍依附於
我由此不欲兩相交戰是故於汝不起怨心
金翅復言汝誠於我無怨心耶龍曰我雖獸
身善達業報審知小惡感果尤重如影隨形

不相離也我及汝身今墮惡道皆由先世造
作罪因汝當憶念如來所說非以怨心能解
怨結唯起慈忍可使銷除譬如火聚投之乾
薪轉增熾然無有窮已以瞋報瞋理亦如此
是時金翅聞是說已怨心即息善心生焉復

右二

二

向龍王作如是說汝今能以慈忍之力息我
瞋恚如汲流泉滅其炎火使我心地頓得清
涼龍王復言我昔與汝無量世時先於佛所
曾受戒法心非清淨復不堅持爲求名聞而
相憎嫉以是因緣墮於惡道我曾發露故能
憶持汝由覆藏今皆忘失汝今應當憶本正
念發慈忍心淨修梵行金翅復言我從今日
普施諸龍安隱無畏即離龍宮還歸本處龍
王乃慰諸龍眷屬復問之曰汝見金翅生恐
怖不各作是言極大怖懼龍曰世間衆生若

見汝者生大恐怖亦如此也爾等諸龍愛惜
身命與諸衆生等無有異當觀自身以況他
使其怨對還歸本處一切有情流轉生死所
可依怙無越慈心大慈心者猶如良藥能愈
衆生煩惱重病大慈心者猶如明燈能破衆
生三毒黑暗大慈心者猶如船筏能渡衆生
三有苦海大慈心者猶如伴侶能越生死險
難惡道大慈心者如摩尼珠能滿衆生所求
善願我由往昔失慈心故墮此龍中不得解
脫若諸衆生建立慈門則能出生無量善法
閉塞一切愚癡昏暗諸煩惱緣而不能入常
生人天解脫安樂諸龍眷屬聞是說已悉除
瞋恚皆起慈心是時龍王見諸同類從已所
化而自慶言善哉我今所作已辦令汝已除

無量惡毒以善淨法補置其處復爲汝等建立清淨八戒齋法當奉持之間浮衆生以八戒水洗浣身心令得清淨斷除無量貪瞋癡垢於人天路而作資糧若能持是八戒齋法當知是人雖無妙服則爲已具慚愧之衣當知是人雖無垣牆則能禦捍六根怨賊當知是人雖非上族則爲已住聖種姓中當知是人雖無瓔珞則具衆善莊嚴其身當知是人雖無珍寶則集人天七種法財不依橋梁超越險道受八戒者功德如此時彼諸龍各作是言我今願聞八戒名字我當頂受勤而行之龍王告曰其八戒者一不殺生二不偷盜三不邪淫四不妄語五不飲酒六者不得過日中食七者不坐高廣大牀八者不得歌舞作樂香油塗身是名八戒清淨齋法要離憤

闇寂靜之處如理作意專注奉持諸龍白言如我之徒離王少時心不寧處依王威神得免衰惱一切時中安隱而住佛法功力無處不可何必須求寂靜之所時彼龍王答諸龍曰不觀所欲則念不起慣習攀緣對境復發譬如濕地而易成泥若在空閑染心無動爾時龍王將諸朋屬至於山林幽曠之處遠離貪欲瞋恚之心常起慈忍以修其身受持齋法經于多日節食身羸加復疲困有諸惡人至彼住處龍聞人聲尋即惺悟此惡人輩見是事已咸生驚駭而作是言此何寶聚從地涌出龍自思念若令彼人見我本狀即時怖死則壞我今修持戒法是諸人等今來至此必貪我身及斷我命時諸惡人復相謂曰我等入山經歷多載未曾見此如是形相衆彩

交燦光耀人目若得此皮當貢王者必獲重賞不亦快乎即持利刀剝裂欲取爾時龍王以慈忍力不生怨恨亦亡痛惱即於是人生攝受想三毒即滅自慰其心不應惜憐怨對卒至不可得脫此諸人等今於我身貪其實貨而行殺戮我寧自死無返害彼不令是人現身受苦時諸惡人奮力勇銳執持利刀剝剖而去是時龍王復自思惟若人無罪爲他支解忍受不報不生怨恨當知此人是爲正士若於父母兄弟妻子能默忍者此不足貴

若於怨害心不加報默忍受者此乃爲難然我今者爲利他故應當默然而忍受之我從無始生死已來枉棄身命不知其幾未嘗特

然施於一人願未來世當與是人無量法財今滿所願是時龍王既被剝已徧體出血痛

苦難堪舉身顫動不能自持復有無量百千小蟲聞其身血悉來唼食龍王乃曰此小蟲等食我身者願當來世施汝法食爾時龍王身受楚痛諸龍覩已皆生悲惱王即誓言若我當來得成佛者令我身皮頃得如故作是願已自然平復彼諸龍屬生大歡喜是爲菩薩於惡道中住慈忍力堅持淨戒爲若此也慈力王刺身血施五夜又緣起第八

爾時世尊在舍衛國祇洹精舍坐夏安居時阿難陀於日中分食畢收鉢與諸比丘共詣林間經行徃來宴坐消息乃相議曰今佛世尊出興于世甚爲奇特第一希有於諸衆生多所饒益今此上首憍陳如等五大比丘最初遇佛成等正覺趣鹿野苑說四諦法先得悟解種何善本有何因緣初轉法輪便能悟

入始擊法鼓而先得聞地神涌出報虛空神已至諸天皆爲作證謂憍陳如已得了解作是念已即從座起具以上事而白世尊是時如來語阿難曰汝所問者非無因緣我於往昔憐愍彼故曾刺身血濟活其命使除飢渴令得安樂以是因緣於此生中從我聞法先得悟解尊者阿難復白佛言願以其事開示未聞令彼衆會心得泰然佛告阿難乃往古世經于無量阿僧祇劫此閻浮提有一國王其名慈力有大名稱福智深廣相貌端嚴威神罕匹統領八萬四千小國后妃眷屬其數十十二萬臣佐共治政事彼慈力王久遇先佛植衆善本樂修慈行仁恕和平於諸衆生施之快樂復起悲心矜恤貧窶有苦衆生皆蒙拯拔復生喜心崇重賢者常以愛語普令

忻悅復起捨心不生喜慍於內外財而無慳惜等視衆生如一子想如是修作四平等行於多劫中未嘗懈廢復以十善誘掖臣庶各各遵承嚴持清潔國土安泰靡不相慶有諸疫鬼及五夜叉常吸血氣觸惱於人由彼皆修十善之行淨身語意衆殃消殄諸天善神常爲守護設有邪魅諸惡鬼神雖懷損害而不得便時五夜叉來詣王所咸作是言我等徒屬仰人血氣得全軀命由王教導一切人民皆修十善我輩從此不得所食飢渴頓乏求活無路大王慈德救諸苦惱獨於我曹不施恩惠王聞是說極傷憫之即自思惟夜叉之徒唯飲人血作何方計滿其所求當破我身可能濟彼乃刺五處血即逆流時五夜叉各持器至取之而飲旣飽且喜王乃語曰我

以身血救汝之命若充足者吾無所希唯修十善則爲報恩願未來世我成佛時最初說法先度汝等以甘露味除汝三毒諸欲飢渴令得清淨佛告阿難欲知徃昔慈力王者豈異人乎我身是也五夜叉者今此會中憍陳右三

如等五比丘是由我宿昔本願力故今得成佛於鹿野苑初轉法輪最先悟解得盡苦際成阿羅漢是時始有佛法僧寶差別名字出現世間時諸大衆聞佛所說皆大歡喜作禮而退

開示少施正因功能緣起第九

佛在舍衛國祇陀林給孤獨精舍與大比丘衆一千二百五十人俱是時國中有一商主與五百人欲汎巨舶入於大海採諸珍寶時彼商主發淨信心欲飯佛僧祈福保祐前詣

佛所致誠勤請如來知已默然許之於其住處明日設食盡其甘羨虔伸供養食畢敷座佛爲說法讚布施行所感如意心田俱勝因少果多商主聞法心開悟解作禮右旋住立一面爾時世尊謂商主曰欲入大海彼多險難必須歸依緣念三寶受持五戒作優婆塞可遂所願安隱而還時彼商主聞佛說法勤懇頂奉求受五戒佛令諦聽善思念之其五者何一不殺生二不偷盜三不邪欲四不妄語五不飲酒是名五戒汝當奉持盡其形壽不得毀犯名優婆塞由彼商主宿植德本聰慧明達能察風波善惡之候衆商勸請以作導師尊尚其人稱爲賢者乃擇吉日聚糧積薪集諸商人共入大海行將數日風濤亘起海神變身爲一夜又其狀醜惡形色青黑口

出利牙牙端火現從波涌出挽船不行問賈客曰汝叵曾見世間可畏有過於我是時賢者覩其怪狀但唯一心緣念三寶由佛加持即除恐怖厲聲對曰我亦曾見更有極惡過汝數倍神問誰耶賢者對曰世有愚人常行

右二

不善造作十惡沒在邪見後墮地獄受苦萬端獄卒羅刹取諸罪人種種治罰或斬或斫或擣或磨分析其身作百千分刀山劍林火車糖煨寒冰沸屎一切備受如此苦楚經千萬劫此之可畏劇甚於汝神乃默然隱身而去漸次前進復經數日海神復變作一人身極甚羸瘦皮骨相連氣息喘迫俯近於船問商人曰汝叵曾見世間有人瘦類於我賢者對曰更有枯悴復過於汝神曰誰耶賢者對曰有愚癡人心性弊惡慳貪嫉妒不知布施

後墮餓鬼頭如太山其咽如針頭髮鬢亂形容燋黑長劫不聞飲食之名如是癯瘦極更過汝海神放船隱身而去漸次前進復經數日海神復變作一丈夫形容年少極甚端正涌出挽船問商人曰汝曾見有年少色力類我已不賢者對曰如汝形質乃有勝過百千萬倍神問誰耶賢者對曰世有智人奉行十善身口意業常令清淨篤信三寶隨時供養其人命終得生天上顏貌端正世無倫匹以汝形儀方於彼者若瞎獮猴比其仙女時彼

右二

海神聞是說已默爾自愧而作是念今此商主識智博達善談報應其辯若斯以一近事試驗問彼即以右手取水一掬乃問之曰掬中水多海水多耶賢者對曰掬中水多海水爲少神復詰曰目擊可見汝今所說誠難爲

信賢者對曰斯言真實決定不謬此非世智之所了知何以明之海水雖多必有枯涸劫欲盡時大千俱壞須彌巨海磨滅無餘以此證知海水必竭若復有人以淨信心持一掬水供養於佛或施衆生或奉父母或乞丐者乃至禽畜之類此之少善正因功能經於塵劫不能窮盡是故當知海水爲少掬水爲多時彼海神心大歡喜即以種種奇異珍寶以贈賢者寄諸珍玩施佛及僧時諸賈客各得還國咸詣佛所稽首作禮持彼海神所寄之物及已所施長跪合掌白言世尊幸蒙如來遙垂慈護入海免難獲寶還家咸荷佛恩願爲弟子佛言善來具苾芻相盡諸有結成阿羅漢

菩薩本生鬘論卷第三